

653.

ARREST  
DV CONSEIL  
DESTAT DV ROY,  
SVR LE TROVBLE FAIT  
en l'Eglise Cathedrale de Rennes  
par le Parlement, le douziesme  
Septembre 1638.



A PARIS,  
Chez ANTOINE VITRAY, Imprimeur  
ordinaire du Roy, & du Clergé  
de France.

---

M. DC. XXXVIII.  
AVEC PRIVILEGE DV ROY.

1907

1907

1907

1907

1907

Case

F


37

326

1638f

THE NEWBERRY  
LIBRARY

EXTRAICT DES REGISTRES  
DV CONSEIL D'ESTAT.

 VR ce qui a esté représenté  
au Roy en son Conseil par  
le Sieur Euesque de Rennes,  
les Dignitez, & Chanoines  
d' l'Eglise Cathedrale de ladite Ville,  
Qu'encores que sa Majesté par Arrest  
dudit Conseil, du trentiesme Octobre  
1637. ait ordonné qu'en l'Eglise Cathe-  
drale de Rennes, outre la place dudit  
Sieur Euesque, six chaires hautes de  
chacun costé du Chœur seroient reser-  
uees pour les Dignitez & Chanoines,  
lors que le Parlement de Bretagne y as-  
sisteroit en corps, suiuant & conforme-  
ment à ce qui a esté obserué, & gardé  
en l'Eglise Cathedrale de Paris, avec  
deffences audit Parlement de prendre  
aucune cognoissance des matieres pu-  
rement spirituelles & Ecclesiastiques,  
& d'apporter aucun trouble ny empes-



chement audit Euesque en l'exercice de sa Iurisdiction: Neantmoins les Officiers dudit Parlement ne voulans obeïr audit Arrest ne se seroient trouuez le jour du S. Sacrement de la presente annee à la Messe, ny à la Procession, & auroient mesme empesché les autres Compagnies de s'y trouuer, ce qui auroit causé vn grand scandale à tout le public. Depuis sa Majesté ayant commandé audit Parlement par ses Lettres patentes des dixiesme Feurier, & dixiesme May d'assister en corps à la solemnité de l'Assomption de la Vierge, qui estoit le quinziésme Aoust dernier, ils auroient arresté le treiziésme de ne s'y trouuer en corps: Et le mesme jour ayant encores receu commandement de sa Majesté par ses Lettres datées d'Abbeuille du 6. dudit mois, d'assister en corps à ladite action, & laisser six places à chacun costé du Chœur ausdits Ecclesiastiques, sur peine de desobeïssance. Le Parlement le quatorziés-

me auroit arresté, les Chambres assemblees, qu'il iroit en corps à Vespres & à la Procession qui se feroit. Mais au lieu de se trouuer à la Chappelle qui estoit preparee pour ceste deuotion, ils se seroient mis au Chœur, où le Seruice ne se faisoit ce jour-là, à cause qu'en ladite Chappelle les bancs estoient disposez suiuant l'Arrest dudit jour trentiesme Octobre, & ne marcherent à la Procession que trois cens pas apres l'Eglise Cathedrale, au lieu d'estre immédiatement apres elle, y ayant grand nombre de peuple entre l'ordre Ecclesiastique & le leur: ce qui fut de tref mauuaise edification au peuple. Et continuant leur mauuais ordre, le 12. Septembre dernier, estant en ladite Eglise Cathedrale pour rendre graces à Dieu de l'heureuse naissance de Monseigneur le Dauphin, auroient apporté du trouble & de la confusion ignominieusement à toute l'Eglise, ayant chassé par violence & force, fraction de Surplis, & iniures,

les Chanoines qui estoient aux hautes chaires du Chœur, quoy qu'ils ne fussent que le nombre de douze, porté par ledit Arrest, & Lettres, & commis des excez, iusques à blesser vn Religieux comme on leur monstroît ledit Arrest du 30. Octobre, en telle sorte que ledit Sieur Euesque fut contraint de se retirer, & aller en vne Chappelle faire l'Office Diuin, & interdit le Chœur, à cause desdits excez commis en presence du S. Sacrement, sans desnommer publiquement, l'excommunication encouruë de droit, pour le scandale & apposition de main sur personnes sacrees, en lieu sacré, faisât leurs charges. Dequoy ledit Parlement aduerty auroit donné Arrest le dix-huictiesme Septembre, portant que ledit Sieur Euesque, à peine de dix mil liures d'amende, & faisie de son temporel, leueroit dans le jour l'Interdit, quoy qu'ils en fussent seuls la cause, & qu'ils eussent auparauant déclaré en estre appelants. Et en outre



auroient de leur auctorité fait emprisonner des Notaires ayans collationné ledit Arrest, & menacé l'Huissier qui l'auroit signifié, de le faire pendre. Requeroiét ledit Sieur Euesque, Dignitez & Chanoines, eu esgard à ce que dessus, qu'il pleust à sa Majesté faire faire par le Parlement, & les particuliers desnommez au procez verbal dressé par le dit Sieur Euesque le 9. Septembre & autres jours, de tout ce qui s'est fait & passé pour lesdites desobeissances, excez, iniures & voyes de fait, telles reparations qu'il sera jugé raisonnable: Euocquer à soy, & à son dit Conseil tous les differents concernans lesdites violences commises le 12. Septembre dernier, circonstances, & dependances, faire desfences audit Parlement, & tous autres Juges d'en prendre cognoissance, à peine de dix mil liures d'amende, nullité, & cassation temporelle, & de tous despens, dommages & interests: Et à tous Huissiers, & Sergens de mettre les

Arrests dudit Parlement, concernant le  
differend des parties, à execution, sur  
peine de priuation de leurs charges.  
Ordonner que les prisons seront ou-  
uertes à M<sup>e</sup>. François Doublart Notai-  
re, & à tous autres Notaires ou Sergens  
qui seront pour ce sujet retenus; casser,  
& annuller l'Arrest de ladite Cour, du  
dix-huictiesme Septembre dernier, or-  
donner que ledit Arrest du trentiesme  
Octobre 1637. sera executé selon sa for-  
me & teneur: Ce faisant, que le Parle-  
ment sera tenu assister en corps en la  
forme accoustumee, tant à la Procef-  
sion du S. Sacrement, qu'à autres lieux &  
actions de deuotions publiques, es-  
quelles l'ordre prescript par ledit Ar-  
rest sera gardé & obserué. Et lors que  
ledit Parlement ne sera en corps en la-  
dite Eglise Cathedrale, que les Presi-  
dents & Conseillers ne pourront pren-  
dre les Chaires affectees aux Dignitez  
de ladite Eglise. Et pour l'execution des  
Arrests qui seront donnez par sa Maje-  
sté, &



sté, & tous autres Arrests, ordonner  
que les Aduocats & Procureurs gene-  
raux seront tenus bailler des Sergents  
qui fassent les exploités de Iustice ne-  
cessaires, sur peine d'interdiction de  
leurs charges, faire deffences audit Par-  
lement de rien ordonner contre eux, à  
peine contre le President & Conseil-  
ler Rapporteur d'interdiction de leurs  
charges. Veu la Requeste dudit sieur  
Euesque de Rennes, les Dignitez &  
Chanoines de l'Eglise Cathedrale de  
ladite Ville, ledit Arrest du trentiesme  
Octobre 1637. Signification d'iceluy  
du douziesme Septembre mil six cens  
trente-huict, les Lettres escriptes audit  
Sieur Euesque, & au Parlement par sa  
Majesté, pour la solemnité del'Assom-  
ption de la Vierge, & rendre graces à  
Dieu de la naissance de Monseigneur  
le Dauphin. Procez verbal dudit sieur  
Euesque de Rennes des neufiesme,  
dixiesme Septembre, & autres jours,  
contenant ce qui s'est passé au sujet des

irreuerences, desobeyssances à l'Arrest du Conseil, excez & voyes de faict, & autres faicts y contenus. Coppie de de l'Arrest dudit Parlement de Rennes, du dixhuietiefme Septembre 1638. portant inionction audit sieur Euesque de Rennes de restablir dans le jour le S. Sacrement au grand Autel du Chœur de ladite Eglise de S. Pierre, & y faire dire & continuer le diuin Seruice, à peine de dix mil liures d'amende, & de saisie de son temporel, signification d'iceluy, dudit jour. Ouy le rapport de ladite Requeste : LE ROY EN SON CONSEIL faisant droit sur ladite Requeste du sieur Euesque de Rennes, a cassé & annullé, casse & annulle les Arrests de ladite Cour de Parlement de Rennes, & tout ce qui a esté fait en consequence d'iceux, a déclaré & declare les emprisonnements faits des personnes de Maistre François Doublart, & autres qui pourroient auoir esté emprisonnez pour ce sujet, iniurieux & torsionnai-

res, ordonne qu'ils soient mis hors des prisons, s'ils y sont encores detenus, & que leur escrouë sera rayé & biffé sur le Registre de la geolle. Enjoint à ladite Cour d'observer à l'aduenir exactement le Reiglement fait par l'Arrest du trentiesme Octobre 1637. touchant les sceances des Ecclesiastiques dans les ceremonies publiques, où ledit Parlement assiste en corps, luy faisant tres-expresses inhibitions & defences de les troubler à l'aduenir aux rangs & sceances qui leur sont ordonnees par ledit Arrest, declarant sa Maiesté qu'elle prendra pour attentat, & desobeïssance à son autorité, les contrauentions qui seront faites audit Reiglement. VEULT que par le Greffier de ladite Cour les minuttes des Arrests donnez au sujet de ladite sceance soient tirees des Registres, & enuoyees dans vn mois apres la signification du present Arrest à Monsieur le Chancelier, & à faute de ce faire par ledit Greffier, Sa-



dite Majesté l'a dés à present interdit de la fonction de sa charge, luy faisant defences d'en faire aucune fonction, à peine de faux. Ordonne sadite Majesté que par le Sieur de Laubardemont Conseiller en ses Conseils, il sera informé des faits contenus audit procez verbal dudit Sieur Euesque, pour ce fait, veu, & rapporté audit Conseil, estre procedé contre les coupables, ainsi que de raison, & pourueu par sadite Majesté de satisfaction condigne à la dignité & ordre Ecclesiastique, de l'injure qui se trouuera luy auoir esté faite. Et cependant enjoint sadite Majesté audit sieur de Bourgblanc President, & à Maistres Busnel, Piguenaye, dit du Guesclin, de Lasse, & Barrin Conseillers en ladite Cour, desnommez audit procez verbal dudit sieur Euesque de Rennes, dans huiétaine apres la signification du present Arrest, faite à leur personne, ou domicile, d'aller trouuer ledit sieur Euesque de Rennes en son Pa-

lais Episcopal, pour le prier de vouloir  
leuer l'Interdit posé au Chœur de son  
Eglise, & à faute de ce faire dans ladite  
huiétaine par ledit de Bourblanc, Bus-  
nel, Lasse, Barrin & Piguénaye, dit du  
Guesclin, Sa Majesté les a dès à présent  
interdits pour vn an de l'exercice &  
fonction de leur charge, declarant tous  
Arrests & procédures auxquelles ils se  
trouueront cy-apres auoir assisté, nuls  
& de nul effect, & eux tenus de tous les  
despens, dommages & interests, que  
pour raison de ce les parties pourroient  
auoir encourus. En cas que lesdits de  
Bourblanc, Busnel, Lasse, Barrin, Pi-  
guénaye, dit du Guesclin, soient refusés  
de demâder la leuee de l'Interdit dans  
ledit temps de huiétaine, pourra ledit  
Sieur Euesque de Rennes, proceder à  
l'encontre d'eux, par les voyes ordinai-  
res & accoustumées en tel cas en l'Egli-  
se. Ordonne en outre Sa dite Majesté,  
que lesdits de Bourblanc, Busnel, Las-  
se, Barrin, Piguénaye, dit du Guesclin,

comparoisstront en personne au Conseil dans six Semaines pour toutes prefixions & delais, pour respondre sur les faits contenus audit procez verbal, & iusques à ce qu'ils ayent obey, les a dès à present interdits de la fonction de leurs Charges. Fait au Conseil d'Estat du Roy tenu à Paris le seiziesme iour d'Octobre mil six cens trente-huict.

Signé, LE RAGOIS.

**L**OVIS par la grace de Dieu, Roy de France & de Nauarre. A nostre amé & feal Conseiller en nos Conseils, le sieur de Laubardemont, Salut: Suiuant l'Arrest, dont l'extraict est cy-attaché sous le contre-seel de nostre Chancellerie, ce jourd'huy donné en nostre Conseil d'Estat, sur ce quinous a esté representé en iceluy, par le sieur Euesque de Rennes, les Dignitez & Chanoines del Eglise Cathedrale de ladite Ville. Nous vous mandons & ordonnons d'informer des faicts contenus au procez verbal dudit sieur Euesque, pour ce fait rap-

*Cet arrest est dans le 1<sup>er</sup> to. des Memoires du Clerge p. 408. Il y en a d'autres au mesme sujet.*